

四庫全書

子部

欽定四庫全書

太平御覽卷四十五

宋 李昉等 撰

地部十

河北諸山

大伾山

枉人山

鮒鰮山

天門山

蘇門山

萬谷根山

郡山

嬰山

牢山

介山

靜巖山

風山

管涔山

五臺山

謁泉山

懸壘山

五指山

紇乾山

元姬山

白登山

火山

三山

稷山

霍山

平山

發鳩山

抱犢山

房山

韓信山

湯山

干山

言山

黑山

雷公山

鼓山

隆慮山

鮮卑山

大碣石山

白狼山

鳴雞山

釜山

川橋山

大翻山

小翻山

飛龍山

無終山

燕山

龍山

孔山

大伾山

隋圖經曰大伾山按書云至於大伾又名青檀山今名

黎陽東山劉澄山川記云黎國也詩云黎侯失國而  
寓於衛其臣勸之以胡為乎泥中胡為乎中露二句  
觀之黎乃國名非山名也又張揖有云成臯山即大  
枉山謬矣

枉人山

隋圖經曰枉人山俗名山陽三山或云紂殺比干於此  
山因得名古凡伯國之地也

鮒觸山

山海經曰鮒鯁山顓頊葬其陽九嬪葬其陰

郡國志曰顓頊所葬俗名青冢山焉

天門山

水經注曰天門山俗謂之百家巖下可容百家故以為  
名山有石穴狀如門纔得通人自平地東南入便至天  
井

蘇門山

十道志曰蘇門山一名蘇嶺俗又名五巖山魏氏春秋

云卽阮籍見孫登長嘯有鳳凰集登隱之處故號登為  
蘇門先生

萬谷根山

郡國志曰晉陽萬谷根山卽羊腸坂也皇甫謐云羊腸  
塞在龍山西卽晉陽西河郡隋煬帝大業四年經此幸  
汾陽改名深谷嶺

十二州志云晉陽有羊腸蟠曲在其西北九十里也  
隋圖經曰朱山去萬谷根山二十里頭上有石壚魏太



武避暑之所羊腸坂在焉

郡山

後魏興國土地記曰太原郡山有石室方丈四尺四壁有篆字人莫之識

嬰山

隋圖經曰嬰為并州之主

牢山

又曰牢山在太原縣東北

趙書曰劉聰遣子粲襲據晉陽猗廬救之遂獵于壽陽牢山檢閱皮肉山為之赤也

### 介山

并州記曰介山一名橫嶺

左傳僖二十四年晉侯賞從亡者介之推不言祿遂與母偕隱而死晉侯求之不獲以綿上為之田曰以志吾過且旌善人杜預註曰西河介休縣城南有地名綿上也

靜巖山

郡國志曰靈石縣有靜巖山在東北二十里即太岳也  
下有五龍泉即文公封介子推綿上之田是也

風山

水經注曰河水南經北屈縣故城西十里有風山上有  
穴如輪風氣蕭瑟習常不止當其衝飄也三伏亦寒草  
木常不定衆風之門故也

管涔山

水經注曰管涔山汾水所出土人亦謂箕管山見多管草或以為名又為管子山

前趙錄云劉元海族子曜嘗隱避於管涔之山夜忽有二童子入跪曰管涔王使小臣奉謁趙皇帝獻劔一口置前再拜而去以燭視之劔長二尺光輝非常背有銘云神劔服御除衆毒曜遂服之隨時變為五色也又有生城堆故縣城於此置也又有汾陽宮隋大業四年置隋末廢也又有汾水出山陽

山海經曰管涔之山汾水出焉西流至于河

十二州記云汾水出周五縣之燕京山蓋管涔之異名也

五臺山

水經注云五臺山有五巒巍然故曰五臺晉永嘉三年鴈門郡人五百餘家避亂入此山見山中人為先驅因而不返遂棲巖野往還之士稀有望見其村居者至詣尋訪莫知所在故俗人以為仙者之都矣中臺之山

頂方三里西北陬有一泉水不流謂之太華泉蓋五臺之層秀仙經云此山名為紫府仙人居之其九臺之山冬夏常冰雪不可居即文殊師利常鎮毒龍之所今多佛寺四方僧徒善信之士多往禮焉

謁泉山

隋圖經曰西河謁泉山一名隱泉山有石室子夏退居之所

水經注曰謁泉山俗云暘雨愆時謁禱是應故得其名

懸壅山

郡國志曰懸壅山一名龍山亦名結紉山多鯀魚食之不驕晉水出焉又有象山前趙錄劉聰征劉琨不克略晉陽踰象山而歸也又汾水自陽曲縣界流入南過晉陽縣晉水從縣南流注之又有洞過水西入于汾晉水下口也又有晉祠水經注曰踞西山枕汾水有唐叔虞祠水側有涼堂晉川之中最為勝處姚勛序行記云高洋天保年中起樓觀於此

五指山

李穆叔趙記曰鯽陽東北有五指山巖石孤聳上有一手一足之迹厥大如箕指數俱全郡國志曰北齊宣王遣人量之長七尺十六國春秋云石勒當生之時此山上草木皆為鐵騎之形

紇乾山

冀州圖經曰紇乾山在城東北登之望桑乾代郡數百里內宛然郡國志云望之數百里內夏恒積雪故彼人



語曰紇乾山頭凍死雀何不飛去生處樂仙人歌曰  
紇乾山頭有神井入地千尺絕清冷是山北十里有白  
登山

元姬山

冀州圖經曰元姬山在馬邑後魏書云道武侍人姓李  
善謳歌死葬此山魏主思之樂府為之曲其曲存焉

白登山

冀州圖經曰白登山在定襄縣西五里

火山

水經注曰西溪水源出火山火山有火井南北七十步  
深不見底炎熱上異常若雷之發響以草爨之則烟騰  
火發其山一名焚臺井東五六尺有湯井廣輪與火井  
烟狀熱勢相同東有火井祠歲時祀之井北百步有東  
西谷廣十步許南岬下有風穴厥大容人其深不測而  
穴中肅肅常有微風雖三伏亦凜冽

三山

隋圖經曰河東都三山即舜所耕厯山也禹貢所謂壺口雷首至於太岳壺口山在慈州太岳在晉州雷首在河東界此山有九名謂厯山首山薄山襄山耳棗山渠猪山獨頭山陟山等名又湯伐桀升自陟之所

稷山

隋圖經曰稷山在絳郡后稷播百穀于此山又左氏傳謂晉侯治兵于稷以畧狄土是此也

後漢書高梁山隋已後又謂稷山

霍山

隋圖經曰霍山在洪洞縣東北霍水出焉

水經注曰發源成潭潭闊七十步而不測其深

爾雅曰霍山出珠玉焉又有聖人崖崖有七穴相通

水經注云霍山北有雀鼠谷中道險左右柱結成偏梁  
閣道累石成路俗謂之魯般橋也

平山

隋圖經曰平山在平陽一名壺口山尚書既載壺口治梁

及岐卽此地也今名姑射山在縣西平水出其下

山海經曰憲山之南三百里有姑射山

冀州圖經云西入文成郡以山為界

莊子云堯見姑射神人杳然喪其天下卽是此山也

### 發鳩山

山海經曰上黨發鳩山多柘木有鳥狀如鳩而文首白喙赤足名曰精衛其鳴自相呼云炎帝女東遊溺海化鳥今猶啣石以填之

抱犢山

道書福地記曰抱犢山在上黨東南高七丈有石城高十丈方一里東南角有草名玉照下枝冬生花高五六尺味頗甘取其末服之方寸七日不飢宜五穀多物無惡毒寇賊不至

玉匱云抱犢山東去恒山之南數百里有穴行三百里出美陽縣西七十里名洞口

隋圖經曰卑山

卑音蔽

今名抱犢山四面危絕山頂有二

泉後魏葛榮亂百姓抱犢上山因以名之也

### 房山

隋圖經曰房山嶺上有王母祠甚靈俗號為王母山  
後漢書曰章帝永和三年幸趙祠房山即謂此山也  
在縣西北十里澱水出焉亦為石白水又謂濁鹿水出  
行唐東入博陵謂之木刀溝一謂袈裟水又從此過石  
童山南流入滹沱河

前燕錄曰慕容雋時房山王母祠前樹自拔根下得玉圭

壁八十三顆光色稍奇雋以為岳神之命以太牢祭之  
每祀有一虎來往祠側性頗馴狎而不害於物

### 韓信山

隋圖經曰韓信山圓峻呼為韓信臺又呼為土門口西  
入井陘即太原路是也旁又有韓信城信破趙駐軍於  
此處焉

### 湯山

山海經曰湯山湯水出焉此湯能愈疾為天下最



隋圖經云湯後側巖有石室一戶無塵穢俗號曰聖人室下經銅烏廟有碑題云漳河神壇是也

干山言山

李公緒記曰栢人縣有干山言山衛詩云出宿於干飲餞於言是也

黑山

九州要記曰黑子昔居汲郡黑山採茯苓餌五百歲或老或少

魏志漢獻帝初平二年黑山賊于毒白統眭固等十萬餘衆以掠魏郡也又云一名青山

列仙傳曰犢子鄴人在黑山常牽一黃犢來過鄴城沽酒陽都女見而悅之遂留相奉侍陽都女眉生而連者也土地十三州志云黑山險為逋逃藪

隋區子圖志云周太祖諱黑因改黑山為青山也

### 雷公山

隋圖經曰雷公山耆老傳曰魏時黑山郡盜張燕等不

立君長直以名號為稱多髯者謂之髯公大聲者謂之雷公時雷公賊保此山因以為名

鼓山

隋圖經曰鼓山亦名塗山

宋承初古今山川記云鼓山如石鼓形二所南北相當二鼓相去十里

冀州圖經云鄴城西有石鼓鼓自鳴即有兵起破城邑魏都賦云神鉦迢遞於高巒是也齊末此鼓鳴未幾云

鄴城有兵而齊滅隋文季年又鳴聞數百里也

### 隆慮山

隋圖經曰隆慮山一名林慮在隋縣西二十里山有三峯南第一峯名仙人樓高五十丈下有黃花谷北巖出瀑布水注成池黃花谷西北有洞穴去地十餘仞下有小山孤竦謂之玉女岩高九百丈其山北一峯名舉峯其地有偏橋即挹犢山也南接太行北連恒岳

顏修內傳曰橋順字仲產有二子曰璋曰琮師事仙人

盧子基於是隆慮山棲霞谷教二子清虛之術服飛龍藥一九十年不飢魏文帝詩曰西山有雙童豈亦謂此也乎

鮮卑山

隋圖經曰鮮卑山在柳城縣東南

崔鴻十六國春秋慕容廆先代居遼左號曰東胡其後雄昌與匈奴爭盛秦漢之際為匈奴所敗分保鮮卑山因復以山為號也棘城之東塞外又有鮮卑山在遼西

之西北一百里與此異山而同號

大碣石山

地理志云大碣石山在右北平驪城西南王莽改曰碣石也漢昭帝亦常登之以望鉅海而勒其石今於此婉轉有石如埆道數十里當山頂望之大石如柱形往往而見立於海之中潮水大至及潮波退不動不沒不知深淺世名之天橋柱也狀若人造亦非人力所為豈昭亦指此以為碣石也

白狼山

郡國志曰白狼山一名鹿首山魏武於此逢獅子處

事見獸部

鳴雞山

隋圖經曰鳴雞山在懷戎縣東北本名磨笄山昔趙襄子殺代王其夫人曰代已亡矣吾將何歸遂磨笄於山而自殺代人憐之為立祠因以名其山為磨笄山每夜有野雞羣鳴於祠屋上故亦謂鳴雞山

釜山

後魏輿地圖風土記曰洛城西北三里有釜山形似釜故以名之其下有舜祠瞽叟祠存焉

### 川喬山

山海經曰川喬山有黃帝祠大荒有軒轅臺射者不敢西向畏軒轅故也

梁湘東王臨終詩云寂寥千載後誰上軒轅臺

### 大翮山小翮山

山海經曰大翮山小翮山有神廟昔王次仲年小入學



而遠常先如其師怪之謂不歸使人候焉實在家等輩  
常見次仲捉一小棘木長三尺餘至著屋間欲取輒不  
見及年弱冠變蒼頡舊文為今隸書秦始皇時官務繁  
多次仲為文簡略赴急用之大嘉使徵不至始皇大怒  
詔檻車送之次仲吟詠化為大鳥出車外翻然高飛徘徊  
長引至于西門山落二翮因名之也

飛龍山

隋圖經曰飛龍山又名封龍山

十六國春秋前趙錄云王俊遣祁弘率鮮卑討石勒戰於飛龍山下勒師大敗

酈道元水經注云汶水東經飛龍山北

又趙記云每歲有疾風雷雨東南而行俗傳此山神女為東海婦三石人猶存衣冠俱全其北即張耳故墟耳

無終山

隋圖經曰無終山一名步陰山又名翁同山

神仙傳云仙人白仲理者遼東人也隱居無終山中合神丹又於山中作金五千斤以救百姓即此山也

水經注云翁伯周末避亂遁無終山山前有泉水甚清夏嘗澡浴得玉澡架一雙於泉側

搜神記云無終山又有楊翁玉田昔雍伯雒陽人父母終葬於無終山山高八十里上無水雍伯置飲有人就飲與石一升令種之後玉生得白璧五雙聘北平徐氏而遂家焉

燕山

隋圖經曰燕山在易縣東南七十里巖側有石鼓去地百餘丈望之若數百石因左右梁貫之鼓東南有石人援之狀同擊勢云燕山石鼓鳴則有兵

龍山

隋圖經曰龍山在易縣西南三十里有龍山石上往往有仙人及龍跡西鬱谷有一地大如車輪春則風出東夏出南秋出西冬出北有沙門法猛以夏日入其東穴

見石堂石人欲窮諸穴便有一人厲聲云法師有滯三  
穴皆如東者不宜仍來見穢猛仍意不息不覺忽在  
穴外也

孔山

水經注曰易水東經孔山北

隋圖經曰孔山有孔表裡通徹故名耳

太平御覽卷四十五

欽定四庫全書

太平御覽卷四十六

宋 李昉等 撰

地部十一

江東諸山

敬亭山

蓋山

九華山

幘山

牛渚山

慈母山

蕪湖山

望夫山

博望山

陵陽山

白紵山

中山

三鶴山

黥山

靈山

巖山

三山

橫山

鐵硯山

九井山

石城山

攝山

黃鶴山

覆船山

北固山

虎丘山

女山

秦履山

馬鞍山

中州山

三白山

馬蹄山

蒜山

會骸山

石姥山

大辟山

花山

虞山



陽城山

姑蘇山

硯石山

香山

華山

包山

石鼓山

粟山

定山

封山

峯嶠山

孺子山

響山

晚山

百丈山

流襄山

印渚山

天目山

卞山

敬亭山

郡國志及宋永初山川記曰宛陵北有敬亭山山有神祠即謝朓賽雨賦詩之所其神云祥華府君頗有靈驗

蓋山

紀義宣城記曰登蓋山一百許步有泉俗傳云昔有舒氏女未適人其父析薪於此女忽坐泉處牽挽不動父

遽告家衆比來惟見清泉湛然其女性好音樂乃作絃  
歌即泉浪涌迴復有赤鯉一雙躍出今作樂嬉遊泉猶  
故沸涌

九華山

九華山錄曰此山竒秀高出雲表峰巒異狀其數有九  
故號九子山焉李白因遊九子覩其山秀異遂更號曰  
九華又曰山之上  
有池塘數畝水田千石其池有魚長  
者半尋頰首頰尾朱鬢丹腹人欲觀之叩木魚即躍以

可食之物散於池中食訖而藏焉其水流洩為龍池溢為瀑泉入龍潭溪有白蟻窟其土如麩不墜歟歲人多食之

顧野王輿地記曰九華山山高一千丈

劉禹錫曰余嘗愛終南太華以為此外無奇愛女几荆門以為此外無秀及見九華始悼前言之容易也

### 幘山

宣城圖經曰幘山北面迤邐連九華山其山層峰鬼峩

遐睇狀如冠幘因號為幘山

牛渚山

宣城圖經曰牛渚山突出江中謂為牛渚圻古津渡處也江表傳云司馬徽論運命歷數云黃旗紫蓋見於東南終有天下者荆揚之君乎

又壽春童謠曰天子當西上孫皓大喜即載妻子及後宮數千從牛渚陸道西上云青蓋入洛陽適還大雪寒凍殆死

輿地志云牛渚山昔有人潛行云此處連洞庭旁達無底見有金牛狀異為精怪而出牛渚山此謂之采石按今對采石渡口上有謝將軍祠又按江源記云商侶於此取石至都輸造石渚因名采石吳初以周瑜屯牛渚鎮西將軍謝尚亦鎮此城

### 慈母山

宣城圖經曰慈母山在當塗縣北臨江丹陽記云山生簫管竹王褒洞簫賦云原夫簫管之所生于江南之丘

墟即此處也其竹圓緻異於衆處自伶倫採竹嶰谷已後惟此幹見珍歷代常給樂府而俗呼為鼓吹山山有慈母祠也

蕪湖山

宣城圖經曰蕪湖山在縣西南山因湖以名之漢末於湖側置蕪湖縣以其地卑蓄水非深而生蕪藻故因以名縣晉為重鎮謝尚王敦皆鎮於此陳平縣廢以其地入當塗縣

望夫山

宣城圖經曰望夫山昔人往楚累歲不還其妻登此山望夫乃化為石其山臨江周迴五十里高一百丈

博望山

宣城圖經曰博望山有二山夾大江東曰博望西曰天門按郡國志曰天門山亦曰峩峩山楚獲吳餘艎於此按其山相對時人呼為東梁山西梁山據縣圖為天門山輿地志云博望梁山東西隔江相對如門相去數里謂



之天門

宋孝武詔曰梁山天表象魏以旌圖形仍以二山為立  
闕故曰天門

陵陽山

宣城圖經曰陵陽山在涇縣西南一百三十里

列仙傳曰陵陽子明釣得白龍放之後五年龍來迎子  
明上丹陽陵陽山一百餘年乃得仙山高一千餘丈又  
有子安仙人也來就子明二十年一旦忽死因葬山下

常有黃鵠棲其處樹上鳴云子安子安也

白紵山

宣城圖經曰宣州白紵山在縣東五里本名楚山桓温領妓游此山奏樂好為白紵歌因改為白紵山

中山

宣城圖經曰宣州中山又名獨山在溧水縣東南一十里不與羣山連接故老相傳云中山有白兔世稱為筆冢精山前有水源號為獨水按輿地記云宣州溧水縣

有獨山有獨水流演不息即此山也

三鶴山

宣城圖經曰三鶴山在溧水縣東南六十里昔有潘氏兄弟三人於此山求仙後道成化為三白鶴於此冲天

黥山

歙縣圖經曰北黥山在縣西北一百六十八里高一千一百七十丈豐樂水出焉舊名黃山天寶六年勅改焉按江南諸山之大者有天台天目而天目近連浙江天

台俯瞰滄海江海者實以地下為百川所歸然歙州則  
江之上游而海之濫觴也今計歙州之平地已合與二  
山齊矣况其山又有摩天戛日之高此則浙江東西宣  
歙池饒江等州山並是此山之支脉明矣其諸峰悉是  
積石有如削成烟嵐無際雷雨在下其霞城洞室符竇  
瀑泉則無峰不有若林澗之下巖巒之上竒踪異狀不  
可模寫信靈仙之窟宅也山中峰有浮丘公仙壇彩霞  
靈禽棲止其上是浮丘公與容成子遊之處昔有人到

壇所忽見樓臺煥然樓前有蓮池左右有鹽積水遂歸引村人上取了不知其處所山下人往往聞峰上有仙樂之聲

靈山

郡國志曰歙縣有靈山天欲雨先聞鼓角聲此山上有圓石如車蓋縣以鼓鳴為候一鳴令遷不鳴令不去山一名三姑山三年一野火燒數未滿人燒之即雨

新安記曰靈村有三山生香草名曰靈香又有黃精山

上有靈壇道士祈請不燒香自然芳馥村人常射獵經  
踐此土犯山神終無所獲

又輿地志云靈山高峻有圓石高數丈上有石蓋也

### 巖山

山謙之丹陽記曰秣陵縣北十二里有巖山山西有石  
室山東大道左有方石長一丈刻銘題贊吳功德孫皓  
所建也

### 三山

山謙之丹陽記曰江寧縣北十二里濱江有三山相接即名三山舊時津濟道也

橫山

山謙之丹陽記曰丹陽縣東十八里有橫山連亘十八里或云楚子重至于橫山是也

鐵硯山

山謙之丹陽記曰永世記云縣西北百餘里鐵硯山廣輪二百許里山出鐵揚州鼓鑄之地

九井山

姑熟記云縣南十里有九井山即殷仲文九日從桓公遊九井賦詩處也

石城山

江乘地記曰石城山嶺障千里相似若一遊歷者以為吳之石城猶楚之九疑也多生箭竹又有桑樹

山上有城固以

名焉

攝山



江乘地記曰扈村有攝山山多藥草可以攝生故名之方四面各起重嶺遊者名繖山形似繖也山頂舊有周

江乘廟

傳云吳時人未詳名字

### 黃鶴山

京口記曰有黃鶴山在縣界晉王恭為刺史改創西南樓名萬歲西北名芙蓉樓至今存焉輿地志云俗傳此樓飛向江外以鉄鎖縻之方已

### 覆船山

梁武輿駕東行記曰有覆船山酒罌山南次高驪山傳云昔有高驪國女來東海神乘船致酒禮聘之女不肯海神撥船覆酒流入曲河故曲河酒美也

北固山

南徐州記曰城西北有別嶺入江三面臨水號云北固劉貞京口記云迴嶺入江懸水峻壁舊北固作固字梁高祖云作鎮作固誠有其語然北望海口實為壯觀以理而推宜改為顧望之顧

輿地志云天景清明登之望見廣陵城如在青雲中

虎丘山

顧顛之虎丘山序曰吳城西北有虎丘山

越絕書曰闔閭冢名虎丘銅槨三重

女山

山謙之南徐州記曰丹徒縣西九里臨江有女山山東  
許貢客刺孫策所也

秦履山

山謙之南徐州記曰暨陽縣西南可三十五里有秦履山傳云秦始皇登之以望江海

馬鞍山

山謙之南徐州記曰暨陽縣北九里馬鞍山東有黃山郭璞墓所

中州山

山謙之南徐州記曰南沙縣北百里有中州山昔在海中去岍七十里義熙以來沙漲遂與岍連

三白山

山謙之南徐州記曰剡縣有三白山出鐵常供戎器山東頭南面有石穴高丈餘容十餘人恒津液流潤天將雨輒有雲羣行從南來映山山亦出雲應之與同北就虞山即大雨矣

馬蹄山

劉損京口記曰石硯東連馬蹄山山上有石馬蹄跡因以為名

蒜山

劉楨京口記曰蒜山無峰嶺臨江魏文帝南望致歎

會骸山

吳郡緣海四縣記曰帶海有會骸山傳云山有金牛昔有兄弟三人共鑿求之坎崩同死因以為名

石姥山

劉道山錢塘記曰石姥山有一石甑厥狀殊似居絕嶺之巔大數十圍下有三石足支之

大辟山

郡國志曰餘杭大辟山本名餘杭山一名曲拳高峻為  
冢旁有曲拳村出藤紙

晉書曰郭文字文舉隱於餘杭大辟山山中曾有猛獸  
投一鹿於菴側文舉因以語人人取賣之分錢以奉文  
舉文舉曰我若湏此自當賣之所以相語不湏故也

花山

陸道瞻吳郡記曰吳縣有花山太康中生千葉蓮花於

上故曰花山

虞山

陸道瞻吳郡記曰海虞縣西六里有虞山上有仲雍冢

陽城山

董監吳地記曰富春有陽城山縣氏所葬漢末上有光  
雲氣屬天

姑蘇山

董監吳地記曰姑蘇山一名姑胥連橫山之北



越絕書曰吳胥門外有九曲路闔閭造以遊姑蘇之臺望湖中窺百姑淮南子亦謂之姑餘

硯石山

董監吳地記曰硯石山在縣西南門外亦名石鼓又有琴臺在上

越絕書云吳人於硯石置館娃宮

劉逵注吳都賦引揚雄方言云吳有館娃宮吳人呼美女為娃故三都賦云幸乎館娃之宮張女樂而娛羣臣

今吳縣有館娃鄉

香山

董監吳地記曰香山吳王遣美人採香於山因以為名故有採香徑

華山

華山精舍記曰老子枕中記云吳西界有華山可以度難父老云山頂北有池上生千葉蓮花服之羽化因名華山長林森天陰翳蔽日

輿地志曰山上有石鼓晉隆安中鳴乃有孫恩之亂山在縣西六十三里

包山

吳地記曰包山在縣西一百三十里中有洞庭深遠世莫能測吳王使靈威丈人入洞穴十七日不能盡因得玉葉上刻靈寶經二卷使示孔子云禹之書也

又郡國志云洞庭山有宮五門東通林屋西達峨嶺南接羅浮北達岱岳

又按元中記云吳國西有具區澤中包山有洞庭寶室  
入地潛行通瑯琊東武

淮南子云斷修蛇於洞庭

左傳云哀公元年吳王夫差敗越於夫柎今太湖中別  
有夫柎山下有太洞天宮潛通五岳包山上舊無三班  
謂虵虎雉侯景亂後乃有虎虵為人之害

### 石鼓山

郡國志曰吳王離宮在石鼓山越王獻西施於此山

有石望之如人騎南有石鼓鼓鳴即兵起

粟山

吳地記曰粟山一名新石頭山上有城下有飛泉石杵  
有吳先王刻題處石杵西有金姥山故老言古於此山  
採金

劉道真記云縣西有姥山絕嶺之上有石甌一人搖動  
與千人不異

定山

吳地志曰定山突出浙江中波濤所衝行侶為患

謝靈運雜詩曰朝發漁浦南暮出富春郭定山杳雲霧  
赤亭無淹泊此山是也

### 封山

吳興記曰風渚在武康縣東十八里古防風國有風公  
廟水經曰風渚山即封山也

### 崖萼山

吳興記曰於潛縣西二里有崖萼山有絕壁高三十許

丈謝安嘗登之臨壁垂足曰伯昏無人何以過是當時稱以為難一云本在太湖中禹治水移於此

孺子山

吳興記曰東遷縣有孺子山徐孺子入吳哭友人嘗登之因以為名

響山

吳興記曰晚山北十八里有響山人於山下語無大小響則隨聲曲折應之

晚山

吳興記曰於潛山西四十里有晚山悉是松木真墨所出也

百丈流襄二山

吳興記曰山墟村旁有山名曰百丈流襄二山堯遭洪水此山不沒但餘百丈因以名山水流襄山嶺因名流襄

印渚山



吳興記曰印渚山上承渚溪水從渚以上至縣悉石瀨  
惡道不可行船以下水道無險故行旅集焉晉王胡之  
為吳興太守至印渚中嘆曰非惟使人心情開滌亦覺  
日月清朗傳云印渚石文如印因以為名

天目山

郡國志曰天目山上有數百年樹名曰鳳翔樹

輿地志云上有兩湖謂左右目故名天目也山極高峻  
上多美石泉水名茶

雜道書曰天目山左高於地七千五百丈右高于地七千丈從廣三千里上有淵中有魚可食無毒蟲

水經注曰吳興郡於潛縣北有天目山山極高峻崖嶺竦疊西臨後澗山上有霜木皆是數百年樹謂之翔鳳林東面有瀑布下注數畝深沼名曰蛟龍池水南流經縣西為縣之西溪

卞山

郡國志曰卞山卞和採玉處山東足有一簣高數尺晉

太康中人開之風雨晦暝遂止歷代莫知所封

宋書云蕭惠明為吳興太守郡界有卞山山下有項羽  
神廟相傳云羽居郡廳事前後太守皆不敢上惠明謂  
綱紀曰孔季恭曾為此郡未聞有灾遂盛設筵榻接賓  
數日未幾惠明忽見一人長丈餘張弓挾矢向之既而  
不見因發背旬日而殞

太平御覽卷四十六

欽定四庫全書

太平御覽卷四十七

宋 李昉等 撰

地部十二

會稽東越諸山

稷山

麻山

雞豕山

濁女山

龜山

秦望山

崆山

塗山

重山

羅山

鶴山

陳音山

銅牛山

土城山

亭山

洛思山

烏帶山

龍頭山

壇讌山

白石山

小白山

縉雲山

桃都山

椒山

覆釜山

石簣山

括蒼山

天姥山

消山

白鶴山

仙石山

石新婦山

靈石山

臨海山

崑門山

石公山

石城山

金勝山

長山

畢嶺

銅山

崑山

騎石山

江郎山

石室山

天堦山

太湖山

孤山

泉山

梨嶺

武夷山

闌干山

雞巖

烏嶺

金泉山

演仙山

稷山

越絕書曰稷山者勾踐齋戒臺也

麻山

越絕書曰麻山勾踐欲伐吳種麻以為弓絃

雞豕山

越絕書曰雞豕山者越將伐吳養雞豕於此山以養死

士



濁女山

吳越春秋曰濁女山者諸寡婦女淫泆犯過者皆輸此山上越王將伐吳其士有憂思者令遊山上以喜其意

龜山

吳越春秋曰怪山者琅邪東武海中山也一夕自來百姓怪之故曰怪山形似龜體故謂龜山

孔暉會稽記曰城西門外百餘步有怪山越時起靈臺於山上又作三層樓以望雲

會稽志曰龜山之下有東武里即琅琊東武縣山一夕移於此

秦望山

水經注云會稽秦望山在州城正南為衆峰之傑涉境便見史記曰秦始皇登之以望南海自平地至山頂七里懸磴孤危峭路險絕記云攀蘿捫葛然後能昇山上無甚高木當由地迥多風所致山南有嵯嶢中有大城越無餘之舊都也故吳越春秋云勾踐語范蠡曰先君

無餘國在南山之陽社稷宗廟在湖之南又有會稽之山古防山也亦謂之茅山也又曰揀山越絕云揀猶鎮也蓋周禮所謂揚州之鎮山矣山形四方多金玉下多珞石山海經曰夕水出焉南流注於湖吳越春秋稱山覆釜之中有金簡玉字之書黃帝之遺識也山下有禹廟廟有故聖像禮樂緯云禹治水天賜神女聖姑即其像也山上有禹冢昔大禹即位十年東巡狩崩於會稽因而葬之言鳥為之耕春銜拔草根秋啄其穢是以縣

官令民不得妄害此鳥犯則有刑無赦山東有陘去廟  
七里深不見底謂之禹井云東遊者多探其穴也秦始  
皇登稽山刻石紀功尚存山側孫暢之述書云丞相李  
斯所篆也又有石山上有金簡玉字之書言夏禹發之  
得百川之理也又有射的山遠望山的狀若射侯故謂  
射的射的之西有石室為射堂年登否常占射的以為  
貴賤之準的明則米賤的闇則米貴故諺云射的白斛  
米百射的玄斛米千

崦山

水經注曰剡縣崦山山下有亭亭帶山臨江松嶺森蔚沙渚平淨浦陽之東北經始寧縣崦山嶠嶠壁立臨江歎路峻狹不得行並行者牽木梢以進不敢俯視嶠西有孤峰特上飛禽罕至嘗有採藥者沿山見涌溪尋上於山頂樹下有十二方石地甚方潔還復更尋遂迷前路言諸仙之所集讌故以壇讌名山嶠北有崦浦浦口有廟廟甚靈驗行人及樵伐者皆先敬焉若相盜竊必

為蛇虎所害北則嶧山與崧山接二山雖曰異縣而峰  
嶺相連其間傾澗懷烟泉溪引霧吹水風馨觸岫延賞  
是以王元琳謂之神明境界備謝康樂居山記

宋書曰張稷子崧字四山稷初為剡令至崧亭生之因  
名崧字四山

### 塗山

郡國志曰塗山禹會萬國之所有石船長一丈云禹所  
乘者宋元嘉中有人於船側掘得鐵履一雙

又會稽記曰東海聖姑從海中乘舟張石帆至二物見  
在廟中又有周時樂器名鐸于銅為之形似鐘有頸映  
水用芒莖刺則鳴宋武修廟得古珪梁武初修之又得  
青玉印

重山

孔晔會稽記曰重山大夫種墓語訛成重漢江夏太守  
宋輔於山南立學教授今白樓亭處是也

羅山

孔晔會稽記曰諸暨縣北界有羅山越時西施鄭旦所居所在有方石是西施曬紗處今名苧羅山王羲之墓在山足有石碑孫興公為文王子敬所書也

### 鶴山

孔靈符會稽記曰射的山西南水中有鶴山此鶴常為仙人取箭曾刮壤尋索遂成此山漢太尉鄭宏少貧賤以採薪為業嘗於山中得一遺箭羽鏃異常心甚怪之頃之有一人覓箭宏以還之



又射的山半嶺有石室仙人射堂東有高巖臨潭有石的形甚圓明視之如鏡矣

陳音山

孔晷會稽記曰陳音山昔有善射者陳音越王使簡士習射射於郊外死因葬為冢今開冢壁悉畫作騎射之象因以名山

銅牛山

孔晷會稽記曰銅牛山舊傳常有一黃牛出山巖食草

採伐人始見猶謂是人所養或有共驅感之箠及輒失  
然後知為神異

土城山

孔暉會稽記曰勾踐索美女以獻吳王得諸暨亭羅山  
賣薪女西施鄭旦先教習於土城山山邊有石云是西  
施澣紗石

亭山

孔暉會稽記曰晉司空何無忌臨郡起亭山楸極望巖

阜基址猶存因號亭山

洛思山

孔晷會稽記曰永興縣東五十里有洛思山漢太尉朱偉為光祿大夫時遭母哀欲卜墓此土將歸洛下冢師相地因謂云去鄉既遠歸思常深忽極目千里北望京洛遂縈咽而死葬山頂故以為名

烏帶山

孔靈符會稽記曰諸暨縣西北有烏帶山其山上多紫

石世人莫知之居士謝敷少時經歷諸山往來遷易功費千計生業將盡後遊此境夜夢山神語之曰當以五十萬相助覺甚怪之旦見主人牀下有異色甚明試取拭視乃紫石因問所從來云出此山遂往掘果得其利不貲

### 龍頭山

孔靈符會稽記曰上虞縣有龍頭山上有蘭峰峰頂盤石廣丈餘葛洪學仙坐其上

壇讌山

孔暉會稽記曰始寧縣有壇讌山相傳云仙靈所讌集處山頂有十二方石石悉如坐席許大皆作行列

白石山

孔暉會稽記曰剡縣西七十里有白石山上有瀑布水懸下三十丈巖際有窰房採窰者以葛藤連結然後至

小白山

名山略記曰小白山在會稽陽城趙廣信以魏末入小

白山受李氏服氣法又師左元放受守中之道後煉九華丹丹成服之太一遣迎今在東華宮為真人

縉雲山

郡國志曰括州

即處州也

括蒼縣縉雲山黃帝遊仙之處有

孤石特起高二百丈峰數十或如羊角或似蓮花謂之三天子都有龍鬚草云群臣攀龍髯所墜者

桃都山

郡國志曰台州桃都山上有大桃樹上有天鷄日初出

桃樹上天雞即鳴雞下聞之而鳴樹下有兩鬼持葦索  
取不祥之鬼食之

椒山

郡國志曰越州椒山吳王遣木客入山求大木不得工  
人憂思作木客吟一旦神木自生合抱長二十丈獻吳  
王造姑蘇臺

覆釜山

郡國志曰台州覆釜山云夏帝登此得龍符處有巨跡

云是夸父逐日之所踐

石簣山

賀循記曰石簣山其形似簣在宛委山吳越春秋云九  
山東南曰天柱山號宛委承以文王覆以盟石其書金  
簡青玉字編以白銀禹乃東巡登衡山殺四馬以祭之  
見赤繡文衣男子自稱元夷倉水使者謂禹曰欲得我  
簡書知導水之方者齋於黃帝之岳禹乃齋登石簣山  
果得其文乃知四瀆之眼百川之理鑿龍門通伊闕遂



周行天下命伯益記之名為山海經

開山圖曰禹開宛委山得赤珪如日碧如月長一尺二寸也

括蒼山

五岳圖序曰括蒼山東岳之佐命

登真隱訣注及吳錄云括蒼山登之俯視雷雨也

天姥山

郡國志曰天姥山與括蒼山相連石壁上有刊字蝌蚪

形高不可識春月樵者嘗聞簫鼓之聲聒耳元嘉中遣  
名畫工寫其狀於團扇即此山也

消山

郡國志曰消山下有夫人祠山北湖陰又有消御史廟  
孤石聳出似婦人豔粧而坐

白鶴山

郡國志曰白鶴山者昔有白鶴飛入會稽雷門鼓中擊  
之聲震洛陽

臨海記曰郡西有白鶴山山上有池泉水懸溜遠望如倒挂白鶴因名挂鶴泉

又郡國志曰漢末有徐公於白鶴山成道控鶴騰虛而去又有鶴掛嶺猶有翱翔之勢

### 仙石山

臨海記曰仙石山上有館土人謂之黃公客堂兩邊有石步廊觸石雲起崇朝必雨有四竿修竹風吹自垂空際拂石皆淨即王方平遊處也

石新婦山

臨海記曰石新婦山亦名似人山土石悉紺色列石參差似人形遠望如鳥之俯仰宋文帝遣畫工模寫山狀時一國盛圖於白團扇焉

靈石山

臨海記曰靈石山者山有寺當孫恩作叛毀材木以為船舸山石即於空中自然而落賊每有所傷故曰靈石山

臨海山

臨海記曰臨海山山有二水合成溪曰臨海一水是始  
豐溪一水是東女溪至州北兩溪相合即名臨海溪山  
因溪名

岨門山

郡國志曰岨門山在海中腹有孔上達於頂有聲即大  
風不風即水涌出必見大兵吳將平孔內有聲遠聞千  
里

石公山

東陽記曰石公山孤石望如石人坐其傍又有如石人狀似新婦著花履焉或名新婦巖

石城山

吳錄曰永康有石城山

海內南經曰三天子都在閩西海北郭璞注云在新安歙縣東又引張氏土地記云東陽縣南四里有石城山上有小石城云黃帝曾遊此山即三天子都也

金勝山

郡國志曰金勝山昔有人於此拾得金勝因以名之山有趙炳祠炳善方術廟至今無蚊蟲

異苑曰孫權時建康人入山還得大龜烹之不爛即此山也

長山

郡國志曰長山相連逕三百里一名金華山即王方平初起遇道士教以仙方處

吳錄地理志曰常山仙人採藥處謂之長山山南有春  
草巖折竹岩岩間不生蔓草盡出龍鬚云赤松羽化之  
處有似龍鬚而麓大者名為虎鬚不中為席但以其心  
為燈炷

又抱朴子云左元放言金華山可以合神丹免五兵洪  
水之患又按輿地志云金華山連亘三百餘里

### 畢嶺

輿地志曰東陽畢嶺之下有錢嶺往往人於嶺下獲大



錢今俗謂之錢嶺

銅山

東陽記曰銅山下有泉色鮮白號為銅泉

又按異苑曰吳時有軍士五百人破洞得一銅釜將欲破之水從中暴發遂成湖被溺人皆死於此

崑山

東陽記曰崑山頂上有一孤石高可三十丈其形如甌人謂之石甌

騎石山

郡國志曰騎石山如人騎馬而無頭昔有神巫以印拍馬馬頭即落則此山也

江郎山

郡國志曰江郎山有三峰峰上各有一巨石高數十丈歲漸長成昔有江家在山下居兄弟三人神化於此故有三石峰在焉有湛滿者亦居山下其子仕晉遭永嘉之亂不得歸滿乃使祝宋言於三石之靈能致其子靡

愛斯牲旬日中湛子出浴水邊見三少年使閉眼入車  
欄中但覺去如疾風俄頃間從空墮恍然不知所以良  
久乃覺是家園中也

石室山

郡國志曰石室山一名石橋山一名空石山晉中朝時  
有王質者嘗入山伐木至石室有童子數四彈琴而歌  
質因放斧柯而聽之童子以一物與質狀如棗枚含之  
不復飢遂復小停童子語曰汝來已久何不速去質應

聲而起柯已爛盡

天階山

建安記曰天階山在將樂縣南二十里山下有寶華洞  
即赤松子採藥之所洞中有石燕石蝙蝠石室石柱并  
石白石井俗云其井南通沙縣溪復有乳泉自上而滴  
人以服之登山頂者若昇碧霄故有天階之號

太湖山

建安記曰太湖山在浦城縣西南一百里一名聖湖山

湖在山頂昔有採藥者止此湖畔見滿湖芙蓉涉水採之乃石也亦有禽鳥遠望如飛近視則石

孤山

建安記曰孤山在環嶂之間其地坦平悉是溝渠阡陌以此山挺然孤立因以名之

梁江淹為吳興令云此地有碧水丹山珍禽靈木為吳興勝境

泉山

泉山記曰山頂有泉分為兩派一入處州一入建溪即漢書朱買臣所謂東越王居保泉山一人守險千人不得上即此山也

梨嶺

泉山記曰梨嶺因梨以名之記云南嶺下道東有種梨古亭跡存焉

武夷山

蕭子開建安記曰武夷山高五百仞巖石悉紅紫二色

望之若朝霞有石壁峭拔數百仞於煙嵐之中其石間有水碓礮簸箕籬竹箸等物靡不有之顧野王謂之地仙之宅半巖有懸棺數千

傳云昔有神人武夷君居之故因名之又坤元錄云建陽縣上百餘里有仙人墓山亦神仙所居之地

闌干山

建安記曰闌干山南與武夷山相對半岩有石室可容千人岩口有水闌干飛閣棧道遠望石室中隱隱然有

牀帳几案之屬岩石間悉生古柏懸棺仙葬多類武夷  
雞巖

建安記曰雞岩隔澗西與武夷相對半岩有雞窠四枚  
石峭上不可登履時有羣雞數百飛翔雄者類鷓鴣  
魏王秦坤元錄云武夷山澗東一巖上有雞栖即此是  
也

烏嶺

烏嶺山記曰烏嶺峻極不通牛馬因其烏居山連接因



以為名

魏王泰坤元錄云邵武北有庸嶺一名烏嶺北隰中有大蛇為將樂令李誕所殺者


金泉山

建安記曰金泉山南枕溪有細泉出沙彼人以夏中水小披沙淘之得金山西有金泉祠

演仙山

建安記曰演仙山故老相傳云演氏鍊丹於此山竈之

餘基僅存焉此山東面亦略通人逕山中出摘其味甘  
人有食者則可攜之出山即迷道有演仙水出此山當  
郡城北為大河莫知其深淺其下有暗竇入城流出於  
劍潭居人資之常流不絕



太平御覽卷四十七

欽定四庫全書

子部

太平御覽卷

四十八至  
五十三

詳校官侍讀學士臣沈咸熙

負外郎臣牛稔文覆勘

總校官降調編修臣倉聖脈

校對官中書臣袁文邵

謄錄監生臣蕭日昕

欽定四庫全書

太平御覽卷四十八

宋 李昉等 撰

地部十三

南楚諸山

靜山

驚磯山

黃鶴山

烽火山

雞翅山

闔閭山

印山

朔山

望夫山

翠屏山

九宮山

角山

鐘臺山

武昌山

樊山

西塞山

白雉山

鳳栖山

神人山

南昌山

松門山

馬當山

釣磯山

雞籠山

五女山

射的山

石印山

龍虎山

羊山

羅霄山

鍾山

望鳳山

昌山

石室山

黃唐山

儲潭山

赤石山

螺亭石山

上洛山

空山

金雞山

峽山

梓潭山

柴侯峽山

官山

君山

盤固山

歸美山

莫巨山

五章山

麻山

鄧公山

明府山

鶴嶺山



石虹山

洪崖山

靜山

江夏圖經曰靜山在縣東南一百一十里其山迴聳無  
連接曲澗清流山林茂峻可以息諸仁智栖遊羽客故  
名靜山

驚磯山

江夏圖經曰在縣東九十里其山無連接西南俯臨大  
江下有石磯波濤迅急商旅驚駭故以為名

黃鶴山

江夏圖經曰在縣東九里其山斷絕無連接舊傳云昔有仙人控黃鶴於山故以為名故梁湘東王晉安寺碑云黃鶴從天而夜響是也

烽火山

江夏圖經曰烽火山在縣東北四十里

梁典曰梁武征齊頓軍於此舉烽火相映故名烽火山

雞翅山

江夏圖經曰雞翅山在縣南八十里昔有金雞飛集於此故名雞翅

舊記云金水有金雞翅山鷄向南飛產金於此水故名金水

闔閭山

武昌記曰昔闔閭與伍子胥屯衆於此山為城故曰闔閭山史記曰闔閭九年伍子胥伐楚又吳越春秋云伍子胥將吳兵攻破楚掘楚平王之墓蓋嘗屯軍於此山

是也

印山

武昌記曰奉新縣有渚石臨水高三十丈上有字髣髴似印故曰印山

輿地志云縣西有石臨水高三十丈有書字為印山此即是也

朔山

武昌記曰朔山有竹長一十餘丈圍數尺常有聲天將

雨此竹鳴焉今無此竹

望夫山

輿地記曰望夫山上有望夫石層生蕪菁遂以名山上  
有石高三丈形如女人謂之望夫石

又記曰武昌郡奉新縣北山上有望夫石狀如人立者  
今古相傳云昔有貞婦其夫從役遠赴國難攜弱子餞  
送於此山既而立望其夫乃化為石因此為名焉

翠屏山

輿地志曰江水入富池一百八十里得奉新上流三百里有城山三面壁立一面峻極水是奉新大源本名石城山天寶五載改為翠屏山

九宮山

武昌記曰九宮山西北陸路去州五百八十里其山晉安王兄弟九人造九宮殿於此山遂以為名

角山

武昌記曰天欲雨其山有聲如吹角以此為名

鐘臺山

武昌記曰鐘臺山在縣東南一百里上有桃花洞洞側有李邕讀書之所荒基遺址石室花木猶在上有一石臺臺上有一鐘或時鳴響遠近皆聞故名鐘臺山也

武昌山

續搜神記曰晉武世宣城人秦精常入武昌山採茗遇毛人長丈餘引精至山西示以聚茗而後去俄而復還乃探懷中橘遺精精怖負茗急歸

樊山

江夏圖經曰樊山西陸路去州一百七十三里出紫石  
英山東數十步有岡岡上甚平敞青松綠竹常自蔚其  
下有水溪凜然常有寒氣故謂之寒溪有蟠龍石謝元  
暉詩云樊山開廣宴是也

又干寶搜神記云樊山若天旱以火燒山即得大雨今  
往往有驗

武昌記曰樊山孫權常獵於下見一姥問獵得何物答



曰只獵得一豹曰何不見其尾言訖忽然不見權於後立廟祀之

### 西塞山

江夏風俗記曰西塞山高一百六十丈週迴三十七里峻崿橫江危峰斷岬長波所以東注高浪為之西翻袁宏東征賦云沿西塞之峻崿是也

又江表傳云劉勳敗於彭澤因走入楚江聞皖已沒遂投西塞

白雉山

江夏圖經曰白雉山其山上有芙蓉峰前有獅子嶺後有金雞石西出金南出銅自晉宋南陳以來常置立爐冶烹煉

鳳栖山

江夏圖經曰鳳栖山西北陸路去州二百二十五里吳建興年中鳳凰降此山因以為名山有石鼓鼓鳴則雨

神人山

帝歷記曰神人山吳建衡三年有神人乘白鹿從此山  
出名神人山

南昌山

豫章圖經曰南昌山者昔吳王濞鑄錢之山時有夜光  
遙望如火以為銅之精光

梁氏十道志云以豫章有銅山山中有洪井飛流懸注  
其深無底是也山有洪崖先生鍊藥之井亦號洪崖山  
有石臼存焉

松門山

豫章圖經曰松門山者以其多松遂以為名北臨大江及彭蠡湖口山上有石鏡光明照人謝靈運彭蠡湖口詩云攀崖照石鏡牽葉入松門是也

馬當山

九江記曰馬當山高八十丈週迴四里在古彭澤縣北一百二十里其山橫枕大江山象馬形迴風急擊波浪涌沸舟船上下多懷憂恐山際立馬當山廟以祀之

釣磯山

異苑曰釣磯山者陶侃嘗釣於此山下水中得織梭一枚還掛壁上後化成赤龍從空而去其山石上猶有侃迹存焉

雞籠山

郡國志曰江州雞籠山山有石雞冠距如生有道士李鎮住此山下常賞翫之雞一旦自毀鎮曰雞既如此吾其終乎果卒

五女山

郡國志曰江州五女山始皇死五女葬此山天昏每聞  
箏笛之聲

射的山

郡國志曰射的山者故老相傳云上有玉在石壁內遙  
望似有白處曾有胡人來取上山後遇風雨不果得今  
遠望頗似射侯故名射的焉

石印山

吳志曰天璽元年鄱陽郡言歷陵山石有文理成字巫  
言石印神有三郎皓遣使以太牢祭并印綬拜三郎為  
王

又按江氏記云歷陵有石印山臨水高百丈有七穿駢  
羅穿中色黃赤相續因謂之石印山

### 龍虎山

信州圖經曰龍虎山在貴溪縣二山相對溪流其間乃  
張天師得道之山

羊山

宋永初山川記曰商安縣西有羊山山有燃石黃色而理簾以水灌之便熟若石灰以鼎置之烹煮可熟

羅霄山

王孚安成記曰萍鄉羅霄山澤水所出傍出石乳天旱吏人禱之因以大木長三四丈投井中即雨水懸轆井溢輒令木涌出而雨止蓋潛龍之穴也以陽居陰神精上通故叩之而必有所感則蜀都賦所云應鳴鼓而興



雨者也

鐘山

裴子野宋略曰永嘉元年鐘山因洪水有鐘從山流出時人得之送上驗銘云是秦時樂器因以為名

又安成記曰鐘山臨水阻峽春夏則湍洑涌沸湧上白沙如米兩岼石山各有九十餘里以之候歲若一岼偏饒則其方豐稔民以為準

望鳳山

宜春圖經曰望鳳山在州西北七十里上有一峰遠觀似鳳因以為名

昌山

宜春圖經曰昌山在州東六十里舊名傷山週迴連延一百八十里袁江流于其間巨石枕崎潺激舟人上下多傾覆故名傷山顧野王輿地記云時人以傷為非善徵乃改為昌山

石室山

宜春記曰郡有石室山山有數石室相通高十餘丈皆相似素壁若雪萬象森羅因以為名

### 黃唐山

輿地志曰贛縣黃唐山有石室數千間屋上通天窗下有方榻者二十人巾櫛而坐傍有小石室七所相通悉有石人室前時有車馬跡春夏草不生無諸毒蟲林木繁茂水石幽絕蓋靈仙窟宅也山下居人每丙日輒聞山室有笳鼓簫樂之音

鄧德明記云有石子如彈丸聚在山角至丙日不復見他日復有其山獨立高一千三百丈相傳以石室呼為黃唐廟因以為名

儲潭山

南康記曰儲潭山俯臨清潭有儲君廟因以名焉

輿地志云咸和二年刺史朱偉所立常有漁者釣於此潭得金鎖索引舟中長數百丈忽一物隨鎖而來其形如水牛眼赤角白見人驚駭拽走而漁以刀斷得數尺

究不知其所由然也

赤石山

南康記曰赤石山大石連聳燦若舒霞山角多赤石有玉房瓊室者舊相傳云宋元嘉年中有人自稱安道士者不知何許人被服巾褐栖於此山中數十年忽失所在其後時復有見者天寶六年勅改為玉房山

螺亭石山

南康記曰螺亭山有大石臨水號曰螺亭云昔有貧女

採螺忽夜中見衆螺張口亂噉其肉貧女乃死其伴因殞水傍其冢化為巨石螺殼無數號曰螺亭石山

上洛山

輿地志曰虔州上洛山多木客乃鬼類也形似人語亦如人遙見分明近則藏隱能斫杉枋聚于高峻之上與人交市以木易人刀斧交關者前置物枋下却走避之木客尋來取物下枋與人隨物多少甚信直而不欺有死者亦哭泣殞葬嘗有山行人遇其葬日出酒食以餉

人山中有石墨可書

空山

南康圖經曰空山晉咸康五年太守庾恪於西山麓中  
建立神廟歷代祈雨最有靈應

又郡國志云空山在郡南山多林木果實食物一郡皆  
資此山雖名空山其出物百倍於他山

金雞山

南康記曰金雞山臨貢水石色如霞其傍有穴廣四尺

一石正當穴口如彈丸嘗有金雞出入此穴晉義熙中再三出見有人挾彈放丸於穴口化為石其雞至今不見因號曰金雞穴宋永初中又見栖翔於此

峽山

南康記曰峽山上時有夜光飛焰遙見若火焰燎于原從峽沂流數十里有石臨水名曰蛟窟天寶六載勅改名夜光山

梓潭山



南康記曰梓潭山有大梓樹吳王令都尉肅武伐為龍舟槽斫成而牽挽不動占云須童男女數十人為歌樂乃當得行遂依其言以童男女牽拽沒於潭中男女皆溺焉其後天晴朗髣髴若見人船夜宿潭邊或聞歌唱之聲因號梓潭焉

### 柴侯峽山

南康記曰柴侯峽山漢靈帝時有劉叔喬避地於此死葬村側自云柴侯墓晉末喪亂有發其塚者忽有大風

雨棺及松柏悉飛渡水移上此峰其棺乃化為石因是名焉

官山

南康記曰官山天寶六年改名珠玉其山高峻出善鳥香草嘗有人於此山見大珠玉相傳謂之官山

君山

南康記曰君山翠麗鮮明遙若臺榭一名曰媧宮亦曰女姥山山去盤固山五十里上有玉臺方廣數十丈上

有自然石室形風雨之後景氣明靜頗聞上有鼓吹之聲

盤固山

南康記曰盤固山有石井井側有大銅人常守之按此石井五百年水一湧起高數丈銅人以手掩之其水即止其山盤紆峻增因號盤固山焉

歸美山

南康記曰歸美山高數百丈遠望嵯峨靈闕騰空故老

謂之神闕其山有水出焉四面嶮峻自然有石城高數十丈週迴三百步又有石峽左右高五六十丈勢若雙闕其狀入雲復有古石室色如黃金號為金室有鸚鵡鳥形色鮮潔自愛毛羽其隻者或鑿水悲鳴自絕方知孤鷺對鏡為不虛矣山頂有木枋數百片高危非人力所及

莫巨山

荀伯子臨川記曰巖內有石人坐石盤上體有塵埃則

興風雨洗訖晴日遍體潔朗如玉瑩淨民以為準焉

### 五章山

荀伯子臨川記曰五章山絕岩嶮峭有蜜蜂依之為房其形如笠採者皆懸磴數十丈然後獲之

### 麻山

荀伯子臨川記曰麻山或登之者望廬岳彭蠡皆在其下有黃連厚朴恒生焉又有楓樹及數千年者如人形眼鼻口全而無臂脚入山往往見之或斫之者皆出血

人以籃冠其頭明日輒失籃俗名楓子鬼其山竹木稠  
密如麻因名麻山天寶六年職方奏改為豐材山焉

鄧公山

信州圖經曰鄧公山在縣北本名銀山因鄧公為鄧公  
場儀鳳二年邑人祭山山頽陷焉按開山記云總章二  
年邑人鄧遠經刺史豆盧公陳開山之便尋為山陷後

太平御覽卷四十七